

## فريق التفريغ بموقع الطريق إلى الله

يقدم

من سلسلة "أبجديات أسرية"

جمال بلا دين

(باللهجة المصرية)



لفضيلة الشيخ: عبد الرحمن منصور

رابط المادة: <https://way2allah.com/khotab-item-161017.htm>

الحمد لله والصلاة والسلام على محمد رسول الله وعلى آله وصحبه ومن والاه، أيها الأحبة، السلام عليكم ورحمة الله وبركاته، وأهلاً وسهلاً ومرحباً بحضراتكم.

كان يجلس في مجلس القرآن، كان مُعلِّماً يأتيه الأطفال من كل مكان، يأتيه الأحبة الطلاب يطلبون على يديه الإجازات، تعرّف على أخت هذه الأخت جمالاً بلا دين، جمال بلا دين، حتى حين كنت أتناقش معه قال والله أجمل من الممثلات في حقيقتها بدون ما تضع أصباغ ولا تحط حاجة، قال هي خلقتها ربانية، يا ابني طب مع هذا الجمال فيه دين؟ قال يعني، يعني إيه يعني؟ يعني، يعني إيه برضه يعني؟ يعني إن هي الحمد لله هتبقى كويسة، ودي الفكرة المغلوطة التي يلبس بها إبليس على الشباب.

### اغترار الشباب بالجمال فقط

الشاب طالع فيقول أنا عاوز امرأة متدينة، يعني إيه متدينة يا حمادة؟ فيقول يعني متدينة، بنفس زي ما أنا بعمل كده يعني متدينة، يعني إيه برضه متدينة؟، يعني عاوز واحدة بتصلي، يا ابني هو الدين صلاة فقط بس، يعني برضه لابسة حجابها يعني، طب كويس جداً، طيب خلصنا من دي؟ طب تعالي عند الجمال، بالله عليك يا عم الشيخ أنا عاوز واحدة ما تبقاش امم ولا عاوز واحدة آه، ولا عاوز واحدة ببيصوا لها من فوق ولا عاوز واحدة، يا ابني دي عاوزة ماسورة وعاوزة متر، هوقفها على الميزان يا عم إنت، هاعمل الكلام ده أنا إزاي؟

الشاهد إيه بقي، إن الشباب دائماً عنده فكرة مغلوطة يلبس بها إبليس عليهم، هو راح البيت فقالوا له البيت ده فيه بنت متدينة، وهو يقيناً عارف إن البنت غير متدينة بس دماغه بيلف على إيه؟ الجمال الظاهري، مالوش دعوة بالجمال الباطن ده، هو بيدور على الجمال الظاهري، فيلبس إبليس عليه فيقول له إيه؟ إنت بس روح شوفها وبعدين ربنا المستعان، ما هو ربنا المستعان آه فعمك الحاج راح قعد، حمادة الجميل ده ربنا يستره، شاف البنت ميادة فأول ما قعد قال -سبحان ربي العظيم-، قمر؛ في نفسه وتحركت المشاعر، وحصل عنده نوع من القبول ونوع من الإعجاب، بس إعجاب بإيه؟ بالجمال الظاهر.

وهو قاعد في المجلس معها، بتضحك ضحكة بتسمّع اللي في الشارع وهي قاعدة معاها، آسف يعني معلى أنا هاعملها حاطة رجل على رجل كده أهو، وهي قاعدة معاها عادي خالص، وبابي قاعد وماما قاعدة، والكلام عادي خالص، عادي خالص يا حمادة، مفيش مشاكل، واخدة راحتها والدنيا هايبصه، وأخوها الصغير داخل اطلع برا يا واد، إيه يا حاجة؟ إنت مين ياماما؟ المهم الحاجة الكويسة دي هو خدها مش عشان دينها، خدها عشان إبليس قال له: أنت إن شاء الله -تعالى-، بإذن الله إنت هتبقى سبب إن هي تبقى شيخة، وتصلي على السجادة. فلما رجع ماما، ماما قالت له يا ابني إيه رأيك في البنت؟ قال لها يا أما بصراحة، إنت ما تجيش جنبها حاجة، قالت له طلاق بالثلاثة من أبوك ما أنت واخدها، المهم حصل خناقة وضرب نار والدنيا كانت صعبة جداً.

### ظهور الفتاة على حقيقتها بعد الشهور الأولى من الزواج

المهم حمادة اخترها واتجوز، وقال لأمه طلاق بالثلاث لو ما اتزوجتها لطالع فوق على البرج وناطط في قلب حمام السباحة اللي ورايا ده وأخلص نفسي وخلص من هذه الحياة، فأمه قالت له يا حبيبي يا ابني لا والله العظيم لاجوزها لك واتجوزوا وعاشوا مش عارف إيه وجابوا إيه. يعني جابوا صبيان وبنات وعاشوا في تبات ونبات، المهم بعد ٣، ٤ شهور بدأت هي إيه بقى تظهر على حقيقتها، لو هي طالبة بالجامعة، أنا عايزة أروح الجامعة ماشي روعي الجامعة، طالعة بقى لابسة بمنتهى الجمال والزينة، يعني عاوز أقول تتفجر من الأنوثة وحمادة رايح شغله الصبح تقوله إيه رأيك؟ الله أكبر عليك الله أكبر عليك ده إحنا لو حطينا القمر جنب القمر هيعملوا قفلة مع بعض، ده إنت أجمل من القمر نفسه، ما شاء الله عليك.

راحت الجامعة دخلت في مجموعات مختلطة، أنا بتكلم في واقع، دخلت في مجموعات مختلطة عشان شباب وبنات مع بعض والدروس والمحاضرات وصور واعمل، وبعدين فُتنت بواحد أجمل منها، والله وبالله وتالله زنا بها وحملت، والله وبالله وتالله زنا بها وحملت، الأصل في ده إيه؟ إن الشاب اللي أخطأ في حق نفسه، وأجرم في حق أبوه وأمه وأجرم في حق المجتمع، وأجرم في حق أولاده إنه اختار امرأة بلا دين، بس بيدور على الجمال، ويأتي إبليس يُلْبَس بقى عليه فيقوله إنت بس إن شاء الله تعالى تهديها وهتبقى زي الفل.

### الضياع بسبب عدم اختيار الدين من البداية

شوف بقى الواقع بقى، يا بنت صلي تقوله -صلى الله عليه وسلم-، يا بنتي المغرب هياذن قومي صلي العصر أنا صليت الحمد لله، الحمد لله بيضرب كف على كف، يا جدعان وبعدين آخر لما خلاص يتعب من حياته ده ممكن يركب كاميرا عشان يراقبها، وندخل في دائرة سوء الظن والتجسس، والشك وحط لها برامج تجسس على التلفون، اللي أنا بقوله ده مشاكل إحنا فيها مشاكل حياتية بسبب إن الشاب اللي زي ده ما اختار امرأة دينة من بيت صالح، إنما دور على الجمال، يا حبيبي يا بنت التزمي، حاضر، متحطيش برفيوم يظهر في الشارع، حاضر، ما تحطيش أيلانير ولا تحطي

مسكرة ومسخرة، حاضر، مش عارف ما تعمليش كذا، حاضر، يا بنتي دخلي الحصلة من جوه ما تبينيش شعرك للناس حاضر، حاضر، حاضر، حاضر، حاضر فضلنا سنة إثنين ثلاثة أربعة في الآخر انفجرت قالت له: بقولك إيه؟ أنا عارفة إن أنت كنت جاي لي مش عشان ديني، إنت عارف إن أنا من الأول خرابها، كنت بسمع كليبات وأفلام ويشوف حريم السلطان، واتفرج على التركي وعاملة المصايب كلها، وأنت جاي عشان ديني، إيه رأيك تطلق وتعوج بقها كده، تطلق ولا تعيش؟ يقولها أعيش، عندي ثلاثة أربع عيال هاشرد العيال ومين اللي هيريهم، وأروح في ستين ألف داهية، والآخر طبعًا مسموك من رقبتة، بقايمة ٢٥٠ ألف جنيه، وعنده مؤخر صداق بـ ٦٠،٥٠ ألف جنيه، وعنده ذهب بـ ٤٠،٣٠ ألف جنيه.

وعنده بعد كده نفقة متعة ونفقة عدة، فيقول لا ده أنا زي الفل، أنا أعيش حياتي بره وهي تعيش حياتها جوه، والاثنين يخربوها، الأصل في ذلك الشاب ضيِّع نفسه، وضيِّع أبوه، وضيِّع أمه وضيِّع المجتمع كله، بسبب فساد هذه المرأة التي اقتزن بها، وأنا عاوز أقول للشباب الصالح، خذ الجملة دي مني، أنت هتتجوز امرأة صالحة، الحمد لله فعدت مع الصالحة دي، صاحبة الأخلاق وتكلمت معاها واتناقشت وعجبتك جدًا جدًا جدًا في كل حاجة، إلا إن جمالها لم يسرك، ما عندكش قبول، أقوله إيه رأيك؟ كويسة البيت طيب والبت مثقفة وجميلة وحاجة زي الفل، طب والبت يعني عجبتك كجمال؟ معنديش قبول، ولا عندي إعجاب بيها، في الوقت ده أضغط عليه يتجوزها؟ ممنوع، ليه؟ قال لي عشان خاطر أمي قالت لي خذ بنت خالتك مؤدبة ومهذبة وبنت جميلة وأخوك هيموت عليها، فبدأت تحفِّز الواد، الواد حمادة عمل إيه؟ سمع كلام ماما وهي مش عجباها، معندوش قبول ليها.

### لا يجب الضغط على الأخت أو الأخ لقبول الزواج

وبعد ما اتجوزوا أول ما يشوف أمه والله كانت تقولي كده، تقول حسبي الله ونعم الوكيل، حسبي الله ونعم الوكيل في مين يا واد؟ بيقول على مين؟ على أمه ليه؟ أمه ضغطت عليه فتزوجها، طب ما أنت السبب يا حمادة، وده ليس من العقوق، يعني أملك لما تقول لك خذ دي وأنت شفتها بنت صالحة دينة، إلا إن معندكش قبول للأمر ولا عندك إعجاب بيها، ولا عندك شعور داخلي إن هي هيغمي عليك لما أنت شفتها، يبقى ابتعد عنها وشوف غيرها، ولكن من أجل الأم يعيش على مضض وبعدين يتقلب على جمر الغضى وعلى الشوك فيما أن يطلق وإما أن تحتلع وإما أن يعاملها معاملة سيئة، وإما يضيع حقوقها، وإما يعيش وهو كاره للمعيشة، وإما يروح يتجوز في السر، وإما يتجوز جواز مسيار، يا إما يتجوز جواز عرفي، وإما يفضل بقي لما يبقى تعبان في حياته فيقول خلاص هو ده نصيبي في الحياة، ويفضل مشاكل بينه وبين الأم طيلة الحياة.

اللي أنا عاوز أقوله وأخصه في هذا اللقاء. يا حبيب قلبي إذا كنت هتاخذ امرأة جميلة، خذ امرأة جميلة بدين، أما امرأة جميلة بلا دين هتخسر دينك ودنياك.

**الأمر الثاني:** نظرت إليها لم تسرك، متقبلش عليها، ونفس الكلام للبننت، أبوك قالك ده مهندس ملو هدومه، ده شيخ ما شاء الله عليه، وإنت قعدتي معاه مش عاجبك، لدرجة إن فيه بعض الأخوات لما تقدم لها شاب، الشاب ده عنده كل مقومات المعيشة، عنده وظيفة وما شاء الله حتى جميل الخلق، وجميل الخلق وحاجة جميلة جداً، فالأب يقول للبننت يا بنتي إيه رأيك؟ قالت له أبي أعتذر منك، يعني إيه؟ أعتذر منك قل له إحنا بنعتذر، يا بنتي ليه مش ديين؟ لا ديين، ومش صاحب أخلاق؟ لا صاحب أخلاق، ومش جميل؟ لا جميل، ما عندوش فلوس؟ عنده فلوس، ما عندوش وظيفة؟ عنده وظيفة، إنت رافضة ليه؟ قالت له: كأنه أنا، يعني إيه؟ يعني يقولون كما قال الشاعر: مر النسيم يجرح خديه يعني لو مر شوية هواء يعوروه، من الآخر كده ولبس الحرير لو مسك شوية حرير يدمي بنانه، يعني لو مسك حرير يتعور ويجيب دم، هو كده بسكويت نايتي يا جماعة فهي مش قبلاه كزوج.

فالأب بيقولها علي الطلاق بالثلاثة من أمك إما كنتي متزوجة ده لطلقها، أنا ساعتها أقولها: بقولك إيه؟ إنت روحي قولي لأمك من ورا أبوكي أبويا عاوز يطلقك، واخلمي من الموضوع، وهما يتصرفوا مع بعض بقى، وإنت تخرجي من الليلة دي، أوعي عملي كده ده نوع من العقوق، اللي أنا عاوز أخلصه في الآخر اختار امرأة صالحة مع جمال مفيش أي إشكال خالص، الشيطان يلبس عليك ويقولك البننت هتتصلح وتبقى كويسة وإنت هتعلمها الدين، لا والله يا عمي ما نافع معها إلا التين البرشومي والشوكي، أما الدين مش هينفع معاها خالص بالوضع ده، خد امرأة صالحة من البداية، واترببها بقى على إيديك وتتعلموا مع بعض، وتبقى الدنيا زي الفل، عشان إيه تعيشوا حياة فيها سكر ونبات ويخلفوا صبيان وعيال. وتبقى الدنيا كويسة وتمام والحمد لله رب العالمين.

و-صلى الله على نبينا محمد وعلى آله وصحبه أجمعين- والحمد لله رب العالمين، والسلام عليكم ورحمة الله وبركاته.